

06/05/1998

Mercu tanda kebanggaan kita

Lukman Salleh

DENGAN hanya 128 hari sebelum Kuala Lumpur '98-Sukan Komanwel XVI bermula, mercu tanda temasya kedua terbesar di dunia itu di Kompleks Sukan Negara (KSN), Bukit Jalil, sudah mula menampakkan ciri-ciri keistimewaannya.

Segala kerja keras serta perancangan teliti dalam pembinaan antara kompleks sukan termoden di dunia itu sejak hampir empat tahun lalu, kini hampir bersedia menerima kehadiran 6,000 atlit dari 68 negara Komanwel, September ini.

Kompleks yang tersergam indah itu, berfokuskan kepada Stadium Utama Bukit Jalil, cukup untuk menangkis segala gambaran negatif media asing - daripada kelewatan pembinaan gelanggang, masalah jerebu hinggalah kepada catuan bekalan air - yang jelas mencemburui kejayaan Malaysia.

Kompleks yang dibina dengan kos keseluruhan RM1.2 bilion itu yang mengandungi stadium utama, stadium tertutup, pusat akuatik, stadium hoki, stadium skuasy serta kondominium perkampungan sukan, kini mula menonjolkan keindahannya.

Malah, tiga daripada gelanggang temasya itu - stadium utama, stadium tertutup dan pusat akuatik - adalah antara yang terancang di rantau ini dengan seni bina luaran dan dalamnya pasti memukau mereka yang hadir.

Menteri Belia dan Sukan, Tan Sri Muhyiddin Mohd Yassin, yang melakukan lawatan ke tiga gelanggang utama itu malam tadi, untuk meninjau sistem lampu nyata berpuas hati dengan cahaya yang terang-benderang.

"Saya berpuas hati dengan sistem lampu yang dipasang di tiga gelanggang ini dan nampaknya tidak ada masalah. Cahayanya begitu terang," katanya.

Paling menjadi perhatian ialah stadium utama, dibina dengan kos hampir RM750 juta serta boleh menampung 100,000 penonton, yang kini dalam peringkat akhir pembinaan.

Tempat duduk sudah selesai diletakkan, rumput padang mula menghiijau dan hanya papan markah belum dipasang manakala trek sintetik akan dihamparkan minggu ini.

Cahaya lampu limpah menerangi setiap pelosok stadium dengan susunan tempat duduknya yang berwarna merah, biru dan kuning membentuk corak amat menarik dan memukau pandangan.

Stadium tertutup acara gimnastik yang boleh menampung lebih 12,000 penonton juga begitu indah.

Pusat akuatik, dengan bentuk bumbung yang unik, mampu menampung 2,000 penonton. Kedua-dua kolamnya untuk acara renang dan terjun sudah siap, termasuk papan markahnya.

Kolam renang ini menggunakan peralatan canggih, termasuk sistem kamera yang mampu merakamkan saat gemilang ketika pertandingan.

Kesemua gelanggang utama itu akan diumumkan namanya oleh Perdana Menteri, Datuk Seri Dr Mahathir Mohamad, di majlis perasmiannya sempena kejohanan pra-Sukan Komanwel, 11 Julai ini.

(END)